

08/05/2022

Bouônjour bouanne gens. Ch'est Enid de Gruchy tch'a l'pliaîsi dé vos présenter la lettre Jèrriaise aniet, Sanm'di lé 7 Mai 2022.

J'avons hardi dé traditions en Jèrri et d'èrchettes tchi suivent les saïsons. Auprés les célébrâtions d'Noué et quand l'Èrnouvé nos appraiche, j'pensons ès traditions d'Pâques c'menchant avec Mardi Gras et les crêpes et quand j' 'tais maitrêsse dé Jèrriais, mes clâsses avaient lieu au Mardi, les êfants avaient du fanne à prépathier les crêpes, les tchuithe et bein seux les mangi avec du limon et du chucre, en pâlant en Jèrriais. Lé lendemain, lé Mècrédi des chendres est lé c'menchement dé Carême et quarante jours suivent à Pâques.

Les gâches dé saïson sont les gâches dé Sînm'né, craqu'linnes que nou n'vait pon au jour d'aniet et bein seux, les fanmeuses Mèvelles, il'ont un gout-d'èrvas-y.

Pour lé dîner, Vendrédi Saint suivent lé païsson, les fliottes.

Lé Dînmanche dé Pâques, un aut' grand jour pour célébrer, quand lé Bouan Dgieu fut résuscité. Avec les jours qu'allouongnent et lé temps qui s'caûffe, j'pensons ès aut' fricots comme les Nouvelles patates. La Rouoyale qu'a un unnique goût sîmpliément bouoillie ou fricachie dans du beurre dé Jèrri. Et un oeuf fricachi. Les lédgeunmes lus présentent dans toutes lus couleurs, si fraïches et d'licieuses et iun dé mes favoris r'pas est des pais d'Mai en beurrée et p'têt' un frais maqu'sé fricachi et eune salade avec tonmates, cocombes et chibots.

J'sommes si chanceurs d'aver la mé tout alentou d'nous et il est dit qué nou devthait tréjous touônner dé la grêve avec tchique païsson pour not' théé qué ché s'sait vlicots, baïnîs, coques ou manchots, du capelain, lanchons, pihangnes ou pour eune spéciale occâsion du honmard dans les mathais dg'ieau et si nou-s-est hardi chanceurs des ormèrs en saïson.

Et comme lé S'tembre nos appraiche et qu'les jours quéménchent à raccourchi j'pensons à eune bouanne bollée d'soupe, p'têt' d'andgulle garnie avec d'la sousique ou des pais au fou avec un gigot d'lard ou du "brawn" ou un mio d'lard salé avec des betteraves sous du vinaigre et du paivre et des patates sous lus pé, suivis par des bourdélots ou pâté d'pommes ou d'rhubarbe.

Mais, bouanne gens, j'sommes acouo dans la saïson des Nouvelles patates, la Rouoyale, les fraîches lédgeunmes, les frâses et frambouaises avec d'la crème dé Jèrri. Après touos ches fricots-là, j'vos souhaite un bouan appétit!

Comme lé 9 Mai appraiche, la 77ième annivèrsaithe dé la Libéthâtion des Allemands. Ch'est si à propos dé célébrer chutte grande occâsion qué j'noubliéthons janmais d'èrmèrcier lé Bouan Dgieu pour not' liberté.

Pouor dé mé, j'm'en vais célébrer auve ieune dé mes p'tites fil'yes, Emma. Oulle avait dessiné lé logo pour la 75ième annivèrsaithe et oulle l'a amendé châque année d'pis.

J'avons un r'pas Dînmanche lé 8 avec des anmîns à st Martîn, et lé lendemain à la stâtion dé la Libéthâtion.

La préchaine réunnion d'assemblée est eune arlévée d'gammes à la Trin'té, Sanm'di lé 28 dé Mai. Les billets s'sont à vendre à la porte. J'vos souhaite eune bouanne journée et bouanne santé.

À la préchaine.

Enid de Gruchy